محضر مباحثات الرئيس جمال عبد الناصر مع العقيد معمر القذافي قائد الثورة الليبية القاهرة – قصر القبة في ٤ أغسطس ١٩٧٠ (الجلسة الثانية)

الحاضرون

من الجانب المصرى: من الجانب الليبى:

العقيد معمر القذافي.. رئيس مجلس قيادة الثورة الليبية، الرائد مختار عبد الله القروى، النقيب محمد المقريف.. عضوا مجلس الثورة الليبي.

الرئيس جمال عبد الناصر، حسين الشافعي، على صبرى.. عضوا اللجنة التنفيذية العليا، الفريق أول محمد فوزى.. وزير الحربية.

المحتويات

الموضوع الصفحة

- حديث حول ضرب السويس وخسائر مصر واسرائيل من الطائرات والطيارين ٢ - ٥

محضر مباحثات الرئيس جمال عبد الناصر مع العقيد معمر القذافي قائد الثورة الليبية القاهرة – قصر القبة في ٤ أغسطس ١٩٧٠ (الجلسة الثانية)

عبد الناصر: اتفضلوا.. أعمل لك شاى.

القذافي: لا شكرا.

عبد الناصر: راجع مفرهد من الحر الواحد يبقى راجع مفرهد!

القذافي: كنت نايم في الطائرة.

عبد الناصر: نايم!

القذافي: آه.. حر هناك خالص.

عبد الناصر: لا.. العراق جهنم.

القذافي: في سوريا لا.

عبد الناصر: آه.. بيقول لي: قعدتوا ساعتين.

القذافي: آه.

عبد الناصر: إنتو روحتوا هناك..

القذافي: هناك كل المباني دور واحد.

عبد الناصر: آه.. هناك بيناموا بره في الخلا كمان.

القذافي: شوفت عمارتين أو تلاتة..

الجبهة؟

عبد الناصر: هو بيقول لى ضرب ٣، فانتوم أنا قلت له: ماتقولش غير واحدة، أصل هم امبارح ليه وقعوا؟ هم كانوا عارفين منطقة الصواريخ ومحددينها مبيدخلوش فيها، أول امبارح حصل تغيير. إحنا ماشيين في الصواريخ بنطلع كده نعمل صواريخ ونحمى، أول امبارح نقل فإندبوا امبارح بالمواقع الجديدة ماكانوش عارفينها.

الشافعي: أول يوم للنقل.

عبد الناصر: أول يوم للنقل آه.. فهو ضرب انتين والروس ضربوا انتين.

القذافي: طيارتين ولا صواريخ.

عبد الناصر: طيارتين مش صواريخ.. هو ضرب طيارتين والروس ضربوا طيارتين لكن اللى وقع عندنا انتين طيارين بس، الطيارتين اللى ضربوهم الروس هو بيقول لى: الكراسى وقعت لكن الطيارات انفجرت فى الجو كلها. اذا انفجرت الطيارة الطيار بيضيع طبعا خصوصا اذا كانت محملة قنابل؛ لأن هم الروس موجودين يعنى إحنا جزء وجزء هم.

القذافي: ضربوا هنا؟

عبد الناصر: على مدينة السويس فاضية يعنى المدينة مافيهاش حد لكن المدينة لسه مدخلتش ضمن الصواريخ، لكن لقوا الحاجات الجديدة اللى جابوها الأمريكان للطيارات الفانتوم علشان تعمل تشويش.

القذافي: ماأثرش عليهم؟

عبد الناصر: لا ماهى هتعمل تشويش ايه اذا كان مش عارف! ماهى العملية أساسها المفاجأة جهاز تشويش زائد القنبلة عاملينها للفانتوم.

القذافي: المعامل؟

عبد الناصر: نقلناها هنا جنبنا جزء هنا فی مسطرد ونقلنا جزء فی اسکندریة، مسطرد اشتغل أظن نقلنا أجزاء وأجزاء مانقلنهاش مش بنفس الطاقة. ده فیه کانوا ۳ معامل تکریر هناك.. یعنی دی کانت أکتر واحد بیدی ملیون طن وواحد بیعمل petrochemicals والتانی معرفش بیدی أد ایه، زائد معمل سماد بیدی کان حوالی ۲۰۰ ألف طن. یعنی السویس بلد صناعیة أصلا، لکن المعامل دی فیهم واحد کان بتاع شل ودا اتأمم، والتانی والتالت إحنا عملناهم جداد هناك. وبعدین علشان بنعمل معمل تکریر بیطلع غاز فالغاز بناخده بنعمل بیه سماد؛ عملنا مصنع سماد وعملنا مصنع ورق والمنظفات والفحم الصناعی وکل البتروکیماویات.

ف. فوزى: ٤٧ مليون جنيه في المجموعة بتاعة المحطة..

عبد الناصر: كان يوم فيه حريقة هناك، مات ٥٠ واحد من بتوع المطافى وهم بيطفوا الحريقة؛ لأن هو كان بيضرب فى الفناطيس وعندنا إحنا ييجى ٢٠٠ فنطاس مليانين بترول، فوهم بيطفوا انفجر واحد فيهم ضاع ٥٠ واحد!

الشافعي: فيه كلام في الصحف عن ازاي يعني بتضغط على اسرائيل في جانب إنها تلتزم..

عبد الناصر: لأول مرة Alsop كاتب في الـ News Week وبعدين يعنى عميل صهيوني، فبيقول: إن احنا يجب أن يكون مفهوم إن علينا إن ندافع عن اسرائيل ولكن ليس علينا أن ندافع عن الأرض التي تحتلها اسرائيل.. في آخر عدد في الـ News يعنى كلام جديد..

القذافي: ابتدوا يخافوا.

عبد الناصر: لأن الأول كانوا بيقولوا: أمن اسرائيل يستدعى إنها تفضل فى الأرض دى، وهى العملية كلها الروس الحقيقة وقالوا: إن فيه اتفاق من الأول بينهم وبين الروس إن الروس ميطلعوش القنال والروس طلعوا القنال، دلوقتى كتايبهم فى الصواريخ موجودة فى القنال وطيراتهم بيشتغل. الحقيقة الناس كتر خيرهم يعنى هم هناك بيقولوا: عايزين العملية تخلص علشان يرجعوا أحسن بيقولوا استعمار روسى! برجنيف بيقول لى: الظاهر الأمريكان عمالين يقولوا استعمار روسى فإحنا عايزين نرجع. لكن ما حد رضى يدينا طيار واحد! باكستان يعنى اتصلنا بيهم، وكل الدنيا اتصلنا بيهم، ومرة بعت على راح قابل أولبريخت وقال له: إن احنا مستعدين نعترف بيكم بس ادونا ولو ١٠٠ طيار. وعملوا لنا طيارتين جداد الروس، بناء على طلبنا عملوا طيارة وقولنا لهم عليها ملاحظات عملوا طيارة تانية جديدة؛ اللى هى بعيدة المدى ومتانتها أقوى وحمولتها أكتر وتشتغل كقاذفة مقاتلة الميج ٢١.

القذافي: ليش مش ٢٣؟

عبد الناصر: ماعندهمش يعنى هم قالوا لنا: ما عندهم ٢٣ لأن لسه الانتاج فيها ابتدى قريب، لكن هم بيعملوا طيارة زى الفانتوم باتتين طيارين.. هى عندهم بس معمولة لأغراض استكشاف فعايزين يحولوها لأغراض مقاتلة وقاذفة.

القذافي: فيها ايه ٢٣ فيها ميزات كتير عن الـ ٢١؟

عبد الناصر: أسرع طبعا لكن ماعندهمش كفاية، بدليل إن طيارينهم اللي هنا اللي بعتوهم بعتوا معاهم الد ٢١، علما بأن ده طبعا الاتحاد السوفيتي يعني قطعا لازم طيارينه هيبعت معاهم أحسن طيارة موجودة، بس الـ ٢١ اللي هي R ولا ايه؟

ف. فوزى: MF.

عبد الناصر: هو اذا كان فيه وقف قتال لازم ياخد show قبل وقف القتال، يعنى هم طبعهم كده علشان يخلونا نرفض.

الشهر ده الأسري ۸۸.

ف. فوزى: بعد الإعلان بتاع سيادتك المعنويات بتاع الضباط..

عبد الناصر: فيه بقى حادثة حصلت فى موقع على البحر الأحمر، طيارة سكاى هوك عمالة تضرب فى موقع بالقنابل والراجل عمال ينزل يضرب فيهم ويطلع، وبعدين هم بقى مدافع مضادة للطيارات مافيش فايدة وفى الآخر ضربوه نط بالمظلة نزل فى وسطهم بقى دبحوه! (ضحك)

أصوات: (ضحك)

عبد الناصر: المهم وقع في الموقع موتوه بالرصاص وهو نازل بالمظلة ضربوه بالرشاشات ونزل ميت، وأنا قلت: ده الوضع الطبيعي عمال يضرب فيهم ويموت فيهم وفي الآخر وقع في وسطهم هياخدوه أسير ليه!

القذافي: هو مفكرش في الاستفادة منه كأسير فكر بس في التار وخلاص.

عبد الناصر: والله أنا قلت: ليهم حق يعنى كويس إنهم عملوا كده، وبقول لهم: التانيين إعملوا فيهم كده.

ف. فوزى: بيستجوبوهم.

عبد الناصر: استجواب آه.. أصل ده بنعمل chek مع ده بعدد ده وده وده، ما هو بيقولوا: الطيار اللي وقع امبارح ده الطيارين اللي فاتو جابوا سيرته إنه أحسن طيار عندهم!

ف. فوزى: أنا عندى بقى كشف الطيارين بتوع الفانتوم من الاستجواب بتاعهم، هو بقى شهاب ده..

عبد الناصر: أحسن طيار..

ف. فوزى: أحسن طيار وهو اللي كان بيضرب في العمق، عدد محدود منهم اللي بيضرب في العمق اللي مات قبل كده في حادثة طيارة ضرب دهشور.

عبد الناصر: آه.. ودا ضرب ایه الجدع ده؟

ف. فوزى: ده بيقولوا: إنهم متدربين يضربوا في العمق.

عبد الناصر: أنا رأيى مافيش حد ميتكلمش في العمل السياسي سواء اخوان مسلمين شيوعيين، أنا بقول: مافيش حاجة اسمها ميتكلمش لازم يتكلم الطبيعة كده لازم بالحيلة بكذا بكذا بكذا.

ف. فوزى: وبعدين نفعت بقى كشوف الأسماء وكذا وكذا.

عبد الناصر: فيه واحد طيار كان عليه قصة في الحرب العالمية التانية ألماني مش فاكر اسمه ايه كان مشهور وبطل، وبعدين ضربوه في انجلترا وبعدين قال لهم: إن هاهرب ولا يمكن وأرجع تاني، وبقوا يضحكوا عليه بتوع المخابرات الانجليزي. وبعدين هرب من انجلترا هرب ومسكوه هرب ومسكوه هرب ومسكوه! وبعدين قرروا يعملوا ايه يبعتوه كندا فبعتوه كندا، نط من القطر ودخل الى الولايات المتحدة الأمريكية – ماكانتش فيه حالة حرب – ونزل من هناك على أسبانيا ومن أسبانيا راح ألمانيا وطلع تاني يضرب الانجليز! (ضحك)

أصوات: (ضحك)

عبد الناصر: وبعدين انضرب، قالوا عليه إنه انضرب بالنار في معركة ووقع في البحر مالاقهوش بعد كده!

القذافي: بس ماسلمتوش طيارين لاسرائيل؟

عبد الناصر: سلمنا، كان لنا طيار أسير هم كان ليهم انتين، فإحنا سلمناهم الانتين قصد الطيار بتاعنا وقصد الانتين السوريين بتوع الميج ١٧، قلنا لهم: ادونا الانتين السوريين بتوع الميج ١٧ والطيار بتاعنا كان بتاع سوخوى فوافقوا.

القذافي: ماسلموش ليكم مشهور يعني.

عبد الناصر: لا.. دلوقتى مش هنسلم طيارين، إحنا عايزين كل الطيارين اليهود يجوا لنا هنا أنا مش عايز طيارات أنا عايز طيارين. امبارح بقول لفوزى: أنا مش عايز طيارات عايز طيارين لأن دى بتهزهم معنويا لأن الطيارة اللى بتنضرب الأمريكان بيدوهم مكانها، مادام الطيار بينط فيه اتفاق بيجى لهم تعويض آخر.

القذافي: كام عدد الطيارات الاسرائيلية اللي وقعت على الجبهة عدد تقريبي يعني.

عبد الناصر: قبل الشهر ده كان في الشهر اللي فات قبل كلامنا في موسكو، كان فيه لغاية أول السنة دى ٩ واقعين بالطيران و ٣٣ بالدفاع الجوى.. ده كلام الروس مش كلام الفريق فوزى الفريق فوزى بيقول الضعف! (ضحك) كلام الخبراء الروس ٣٣ و ٩ يبقى ٤٢ وبعدين الشهر اللي فات ومايو..

ف. فوزى: في يونيه الفترة اللي فاتت دى ١٤.

عبد الناصر: يبقى ٥٦.

ف. فوزى: واله ٥ بتوع امبارح.

عبد الناصر: امبارح واحدة بس! (ضحك)

القذافي: أنا سمعت ٤ طيارات.

عبد الناصر: بس هو جاب الطيارين بتوع واحدة بس ما هو ماطلعش في البلاغ، هم بقي كانوا عايزين يطلعوا العدد ده قلت له: هات الطيارين وطلع. بس إحنا مضروب لنا في العملية دى عدد كبير، يعنى هم مضروب لهم كام دلوقتي ييجي ٥٠ حاجة وخمسين إحنا مضروب لنا حوالي ٩٠. يعنى هم عندهم حوالي ٥٠ طيارة وإحنا عندنا حوالي ٩٠. إحنا خسرانين ٩٠ طيارة من ٦٧ لغاية دلوقتي كتير! أحمد حسن البكر مخسرش ولا طيارة!

القذافي: يالا يااخوان.

عبد الناصر: نتغدى ونيجى.